

Proxecto de decreto XXXX/XXXX, do ____ de ____ , polo que se regula o marco galego de competencias dixitais e a certificación galega en competencias dixitais

I

O Estatuto de Autonomía de Galicia establece no seu artigo 4.2 que lles corresponde aos poderes públicos de Galicia promover as condicións para remover os obstáculos e facilitar a participación de todos os galegos e galegas na vida política, económica, cultural e social.

O artigo 27.19 do Estatuto de Autonomía de Galicia atribúe á Comunidade Autónoma de Galicia a competencia exclusiva en materia de fomento da cultura e da investigación, sen prexuízo do establecido no artigo 149 da Constitución española, e, especialmente, o artigo 30.1 do Estatuto establece a competencia exclusiva da Comunidade Autónoma de Galicia en materia de “fomento e planificación da actividade económica en Galicia”, sen prexuízo das bases e a ordenación da actuación económica xeral do Estado.

Ademais, segundo os artigos 27.1 e 28 do Estatuto de Autonomía de Galicia correspóndelle á Comunidade Autónoma galega, como competencia exclusiva, a organización das súas institucións de autogoberno e execución da lexislación do Estado en materia de réxime xurídico da Administración Pública de Galicia. Así mesmo, segundo o artigo 39 do Estatuto de Autonomía de Galicia correspóndelle á Comunidade Autónoma galega a creación e estruturación da súa propia Administración pública, dentro dos principios xerais e normas básicas do Estado.

Pola súa banda, o artigo 31 do Estatuto de autonomía de Galicia prevé a competencia plena da Comunidade Autónoma galega sobre o regulamento e administración do ensino en toda a súa extensión, niveis e graos, modalidades e especialidades, no ámbito das súas competencias, sen prexuízo do disposto no artigo 27 da Constitución e nas leis orgánicas que, conforme o apartado primeiro do artigo 81 da mesma, o desenvolvan, das facultades que lle atribúe ó Estado o número 30 do apartado 1 do artigo 149 da Constitución e da alta inspección precisa para o seu cumprimento e garantía.

A Lei 4/2019, de 17 de xullo, de administración dixital de Galicia, promove no artigo 106 e seguintes, a creación do marco galego de competencias dixitais, para dar resposta a necesidade de acadar unha cidadanía dixitalmente responsable nun contexto na que a relación

coa administración, a vida cotiá e o emprego requiren continuado do uso de tecnoloxías da sociedade da información.

A recomendación do Parlamento Europeo e do Consello de Europa, de 18 de decembro de 2006, sobre as competencias chave para o aprendizaxe permanente (2006/962/CE), identifica a competencia dixital como unha das oito competencias chave que as persoas precisan para a súa realización e desenvolvemento persoais, así como para a cidadanía activa, inclusión social e emprego.

Posteriormente, a recomendación do Consello de Europa, de 22 de maio de 2018, relativa ás competencias chave para o aprendizaxe permanente (2018/C 189/01) incide na necesidade de ampliar e mellorar o nivel de competencias dixitais en todas as fases da educación e da formación, así como en todos os segmentos da poboación.

Enténdese por competencia dixital a combinación de coñecementos, habilidades e actitudes, para o uso seguro, crítico e responsable das tecnoloxías da información e a comunicación para a aprendizaxe, o traballo, o lecer, para a participación na sociedade, así como a interacción coas ditas tecnoloxías. Inclúe a alfabetización en información e datos, a comunicación e a colaboración, a alfabetización mediática, a creación de contidos dixitais, a seguridade, asuntos relacionados coa propiedade intelectual, a resolución de problemas e o pensamento crítico. As competencias dixitais van mais aló de ser hábil ou operativo no uso dos aparellos e dispositivos, senón que implica o uso da tecnoloxía dixital dun xeito seguro, crítico, creativo e colaborador, en todos os eidos da vida.

Como referencia na concreción do que se denominan competencias dixitais, en Agosto de 2013 publicase “DIGCOMP: A Framework for Developing and Understanding Digital Competence in Europe”, froito dos traballos que sobre aprendizaxe e habilidades para a era dixital realizou o Centro Común de Investigación da Comisión Europea - Joint Research Centre (JRC), e cuxo obxectivo principal era contribuír á mellor comprensión e desenvolvemento da competencia dixital en Europa. En 2017 publícase unha versión actualizada: “Digcomp 2.1. The Digital Competence Framework for Citizens”. En maio de 2018 foi publicada a guía “DigComp en acción” (DigComp into Action: Get inspired, make it happen. A user guide to the European Digital Competence Framework).

A definición do Marco galego de competencias dixitais ten coma referencia o Marco europeo de competencia dixital para os cidadáns na súa versión vixente e actualizada, traspoñendo e concretando para a súa mellor aplicación á realidade do contexto galego. O marco galego de competencias dixitais determina os coñecementos, as habilidades e actitudes para contribuír ao desenvolvemento dunha sociedade usuaria dos servizos dixitais avanzados, á mellora profesional e ao benestar colectivo.

O Marco galego pode tomarse coma referencia inspiradora para múltiples definicións e usos prácticos nos eidos profesionais e formativos, nos recursos humanos, nos eidos institucionais ou de recoñecemento non formal. Do mesmo xeito, este marco constitúe a base para o desenvolvemento das ferramentas de auto-avaliación recomendadas por Europa, vencelladas á avaliación das competencias en entornas formativas ou laborais, e para a recomendación de itinerarios formativos que permitan o desenvolvemento competencial.

Resulta especialmente salientable incidir no ámbito do sistema educativo, no que a Resolución do 2 de xullo de 2020, da Dirección Xeral de Avaliación e Cooperación Territorial, pola que se publica o Acordo da Conferencia Sectorial de Educación sobre o marco de referencia da competencia dixital docente, establece que o marco galego de competencias dixitais será adoptado pola consellería con competencias en educación en base ao marco competencia dixital docente establecido a nivel estatal na dita resolución.

Nas ensinanzas do sistema educativo, tal e como establecen o Real Decreto 126/2014, do 28 de febreiro, polo que se establece o currículo básico da Educación Primaria e o Real Decreto 1105/2014, do 26 de decembro, polo que se establece o currículo básico da Educación Secundaria Obrigatoria e do Bacharelato, a competencia dixital é unha das competencias curriculares do alumnado impartida no marco das ditas ensinanzas regradas dependentes da Consellería de Cultura, Educación e Universidade.

Na Formación Profesional, a Lei Orgánica 5/2002, do 19 de xuño, das Cualificacións e da Formación Profesional establece os instrumentos e accións para desenvolver a avaliación e acreditación das distintas competencias profesionais, entre as que se atopan as competencias dixitais, a través das cualificacións identificadas no sistema produtivo e recollidas no Catálogo Nacional de Cualificacións Profesionais, a formación regrada asociada ás mesmas (organizada en módulos formativos, articulados nun Catálogo Modular de Formación Profesional), e os

procedementos de avaliación, recoñecemento e acreditación aplicables en todo o territorio nacional.

Por medio deste decreto, defínese o Marco galego de competencias dixitais establecido pola Lei 4/2019, de xeito aliñado coas estratexias da Comisión Europea nesta materia, e créase a Certificación galega en competencias dixitais que acredita a competencia dixital, definindo os criterios e os procedementos para obtelos, determínanse os órganos da Administración da Xunta de Galicia competentes na súa xestión e acreditación, así coma regúlanse os criterios para a participación de centros colaboradores e o seu rexistro, así coma crease o rexistro das certificacións galegas de competencias dixitais, co fin de simplificar a xestión dixital da certificación e facilitar o seu arquivo e control.

O decreto regula o certificación galega de competencias dixitais, como mecanismo normalizado de certificación por parte da Administración pública, e garante a calidade dos coñecementos, destrezas e capacidades que as persoas posúen no ámbito dixital e segundo os criterios establecidos no marco. Por medio do certificado galego en competencias dixitais, a persoa titular pode acreditar ante calquera instancia pública ou privada de Galicia, as súas competencias dixitais. Ademais, crea o Rexistro das certificacións galegas de competencias dixitais, co fin de simplificar a xestión da certificación e facilitar o seu arquivo e control.

Este certificado substituirá ao certificado galego de competencias dixitais en ofimática, regulado polo *DECRETO 218/2011, do 17 de novembro, polo que se regula a certificación galega de competencias dixitais en ofimática*.

Polo demais se prevé neste decreto a función xestora deste marco por parte da Axencia para a Modernización Tecnolóxica de Galicia na súa condición de entidade pública instrumental do sector público que ten entre os seus obxectivos básicos a definición, o desenvolvemento e a execución dos instrumentos da política da Xunta de Galicia relativa a tecnoloxías da información e comunicacións, así como innovación e desenvolvemento tecnolóxico. A dita axencia ten entre as súas funcións favorecer un contexto dixital, no que a cidadanía poida acadar, actualizar e mellorar as súas competencias dixitais, en liña cos cambios e os usos tecnolóxicos que se integren na sociedade. Tamén son da súa responsabilidade as funcións de deseño e coordinación dos plans formativos en materia de tecnoloxías da información e de boas prácticas no uso dos sistemas de información, así como a xestión dos programas de capacitación dixital do empregado público, en coordinación cos órganos competentes en

materia de formación, e igualmente inclúense nas súas funcións a planificación e coordinar, coa colaboración dos departamentos e institucións con competencias en programas de formación, programas destinados a elevar o coñecemento da cidadanía no uso das novas tecnoloxías.

E se prevé tamén a participación dos departamentos con competencia en materia de función pública e de avaliación e reforma administrativa, o departamento competente en materia de formación profesional para o emprego, así como as escolas de formación da administración pública galega, tanto na definición do marco galego de competencias dixitais como na execución activa dos procesos que permitan acadar unha cidadanía galega competente dixitalmente.

Recóllese neste decreto tamén, o eido específico do sistema educativo galego, no que a Consellería de Cultura, Educación e Universidade, organismo con competencias na ordenación e desenvolvemento das ensinanzas no sistema educativo galego, na formación e desenvolvemento profesional do profesorado que presta servizo nos centros do sistema educativo galego, e na avaliación, recoñecemento e acreditación das competencias e cualificacións profesionais; sexa a entidade xestora dos marcos de referencia específicos neste ámbito, así como entidade formadora e acreditadora.

II

O decreto estrutúrase en 21 artigos, agrupados en cinco capítulos, con unha disposición adicional, unha disposición transitoria, unha disposición derogatoria e unha derradeira.

O capítulo I incorpora as disposicións xerais por medio das que se define o obxecto de regulación e o Marco galego de competencias dixitais.

O capítulo II regula a certificación galega de competencias dixitais.

O capítulo III regula a estrutura organizativa para a xestión e soporte, así coma da relación coas entidades colaboradoras nas competencias dixitais.

O capítulo IV regula o rexistro de certificacións galegas de competencias dixitais así coma o rexistro das entidades colaboradoras.

O capítulo V recolle a singularidade do marco no sistema educativo galego.

De conformidade co exposto, en uso das facultades atribuídas pola Lei 1/1983, do 22 de febreiro, reguladora da Xunta e da súa Presidencia, por proposta do conselleiro de Facenda e Administración Pública e logo de deliberación do Consello da Xunta de Galicia na súa reunión do día XXXXXX de XXXXX de dous mil vinte e un,

DISPOÑO:

CAPÍTULO I

Disposicións xerais

Artigo 1. Obxecto

1. Este decreto ten por obxecto definir a estrutura do marco galego de competencias dixitais, regular o certificado galego en competencias dixitais e establecer os requisitos, criterios e procedementos para a súa obtención.
2. Inclúese tamén a creación do Rexistro de certificacións galegas de competencias dixitais e de entidades colaboradoras.
3. E por último determina os órganos da Administración da Xunta de Galicia competentes na xestión operativa do marco galego de competencias dixitais e o certificado galego en competencias dixitais.

Artigo 2. Finalidade.

As medidas establecidas neste decreto teñen por finalidade:

- a) Dispoñer dun mecanismo normalizado de certificación de competencias dixitais por parte da Administración xeral da Comunidade Autónoma de Galicia que permita a calquera persoa maior de dezaseis anos acreditar o seu nivel de coñecemento, habilidade e actitude no eido dixital.
- b) Fomentar o uso eficiente e eficaz das tecnoloxías mais aló de ser hábil ou operativo no uso dos aparellos e dispositivos, promovendo o uso da tecnoloxía dixital dun xeito seguro, crítico, creativo e colaborador, en todos os eidos da vida.
- c) Ofrecer ás persoas empregadas, as que aspiran a un posto de traballo, aos empregadores e ás administracións públicas unha ferramenta para a mellorar a formación continua, promover o desenvolvemento profesional e simplificar, se é o caso, o proceso de selección e provisión de prazas.

- d) Desenvolver ferramentas obxectivas para avaliar as competencias dixitais, medindo coñecementos, habilidades e actitudes, acreditando que os resultados obtense seguindo métodos apropiados, en condicións controladas, por organizacións autorizadas, e que coinciden cunha norma claramente definida e recoñecida.
- e) Promover nas persoas novas competencias para que poidan adaptarse na contorna cambiante da sociedade dixital, garantindo que coñecen e aproveitan as vantaxes do uso das tecnoloxías.
- f) O desenvolvemento do Plan de capacitación dixital do persoal empregado público, que deberá definir as competencias dixitais mínimas do persoal empregado público.

Artigo 3. Marco Galego de Competencias Dixitais.

1. O marco galego de competencias dixitais define os coñecementos, as habilidades e actitudes necesarias para o desenvolvemento dunha sociedade usuaria dos servizos dixitais en todos os eidos da cidadanía e ven de ser a referencia descritiva sobre a que se sustenta a súa certificación e acreditación.
2. O marco galego de competencias dixitais defínese na súa estrutura e contidos de acordo coas seguintes dimensións:
 - Dimensión 1 : As áreas de dominio.
 - Dimensión 2: Competencias pertinentes en cada área e a súa definición.
 - Dimensión 3: Nivel de aptitude prevista para cada competencia.
3. No marco desenvolveranse os descritores ou identificación dos coñecementos, habilidades e aptitudes relacionadas con cada competencia e que evidencian o seu manexo óptimo para cada nivel de aptitude. Así como os exemplos ilustrativos que evidencian cada unha das competencias en canto aos descritores.
4. Establecese tamén unha especialización en función do colectivo destinatario. Determinarase, dentro do marco galego de competencias dixitais, tanto o ámbito para a cidadanía como para o persoal empregado público. Poderán identificarse colectivos adicionais de especialización.
5. O desenvolvemento concreto das dimensións e especializacións quedará recollido no documento “Bases para o desenvolvemento do Marco Galego de Competencias Dixitais”, que

estará dispoñible a través do portal web institucional da Xunta de Galicia <https://www.xunta.gal>, e dos portais e servizos dixitais das entidades instrumentais do sector público autonómico de Galicia con competencia no ámbito deste decreto.

6. Este documento de “Bases para o desenvolvemento do Marco Galego de Competencias Dixitais” será actualizado cando sexa necesario recoller cambios nas tecnoloxías e de coñecementos, habilidades ou actitudes, ou mesmo na estrutura detallada dos elementos que o compoñen.

7. Cada nova versión será publicada mediante resolución da entidade xestora deste marco, e actualizado nas canles indicadas neste artigo.

CAPÍTULO II

Certificado galego en competencias dixitais

Artigo 4. Definición e destinatarios

1. O Certificado galego en competencias dixitais acredita o nivel de competencia das persoas na utilización das tecnoloxías no eido persoal, social e profesional de forma efectiva, segura, crítica, creativo e cívica:

- a) Valora a competencia dixital da persoa a través dos seus coñecementos, habilidades e actitudes.
- b) Incorpora a visión de responsabilidade no uso tecnolóxico á hora de colaborar, comunicar, compartir, informarse e difundir información na contorna dixital.
- c) Favorece o apoderamento da cidadanía dixital, ao crear un clima fiable e transparente no uso da tecnoloxía aproveitando as vantaxes na provisión dos servizos públicos ou comerciais.
- d) Promove actitudes de pensamento crítico, creatividade e aprendizaxe permanente que axudan a adoptar a vida dixital e adaptarse aos cambios tecnolóxicos constantes.

2. Obterán o Certificado galego en competencias dixitais as persoas maiores de dezaseis anos que acrediten os coñecementos, habilidades e actitudes esixidas para cada tipo de certificación ofertada.

Artigo 5. Tipos de certificacións

1. Establécense dous tipos posibles de certificación:

a) Certificación por áreas de dominio competencial, ou agrupación de competencias, destinada aos niveis de aptitude menores.

b) Certificación por cada unha das competencias, destinadas aos niveis de aptitude mais avanzados.

2. O modelo final de tipo de certificación por nivel de aptitude estará recollido no documento “Bases para o desenvolvemento do Marco Galego de Competencias Dixitais”.

3. O avance entre os diferentes niveis de aptitude será feito de xeito progresivo e a través das formas de obtención previstas neste decreto, sendo obrigatorio ter o nivel de aptitude previo certificado para acceder ao posterior, agás da primeira obtención onde poderá obterse calquera dos niveis dispoñibles.

4. As persoa titular do certificado galego en competencias dixitais poderá acreditar ante calquera instancia pública ou privada de Galicia as súas competencias dixitais.

5. O certificado galego en competencias dixitais terá unha vixencia máxima de cinco anos dende a data da súa obtención, e ao estar vinculado ao Marco galego de competencias dixitais, poderá perder a súa vixencia anticipadamente no caso de que o marco sexa modificado.

6. Cando a perda da vixencia do certificado prodúzase por unha modificación do Marco galego de competencias dixitais, ofrecerase as persoas certificadas a posibilidade de renovar a súa certificación dentro do prazo dos doce meses seguintes á data de perda de vixencia.

7. Cando a perda da vixencia prodúzase por caducidade, transcorridos os cinco anos dende a data da súa obtención, as persoas acreditadas haberán de renovar a certificación nos seis meses naturais posteriores dende a data de caducidade.

8. No caso de que a persoa usuaria non actualice a vixencia da súa certificación perdera o seu dereito de acreditar os seus coñecementos, habilidades e actitudes pasado o prazo de seis meses naturais dende a data de caducidade

Artigo 6. Formas de obtención

1. A certificación galega de competencias dixitais obterase mediante a superación dunha proba convocada para ese fin pola Axencia para a Modernización Tecnolóxica de Galicia.

2. Non obstante, non terán que superar esta proba para obter igualmente a certificación galega de competencias dixitais as persoas que xa teñan acreditados os seus coñecementos por calquera dos medios seguintes:

a) Obtención por acreditación de formación superada e certificada, cuxos contidos estean homologados pola Amtega coma habilitante para a obtención dalgunha das certificacións recollidas neste decreto.

b) Obtención dunha acreditación de unidades de competencia incluídas no Catálogo Nacional das Cualificacións Profesionais cuxo ámbito competencial cubra os contidos formativos que se recollan no Marco Galego de Competencias Dixitais

c) Obtención por convalidacións, homologacións e recoñecemento de certificados de competencias dixitais doutras administracións ou doutros territorios, ou a través da acreditación de títulos, diplomas ou certificados oficiais que acrediten telos coñecementos, habilidades e actitudes descritas para a obtención dalgunha das certificacións recollidas neste decreto.

3. Os criterios de convalidación, homologacións ou recoñecementos quedarán recollidos e publicados no documento “Bases para o desenvolvemento do Marco Galego de Competencias Dixitais”, con indicación de cal é o nivel e dimensión ou competencia ao que dan acceso.

Artigo 7. Probas de avaliación

1. As probas avaliativas poderán realizarse en formato presencial ou a distancia a través da rede de internet, podendo fornecerse modelos mixtos e en todo caso garantindo a fidedigna identificación da persoa que realiza a proba.

2. A identidade das persoas que realicen ás probas quedará garantida polo uso de servizos de autenticación baseados no uso de certificado electrónico, DNIe, autenticación Chave365, usuario e contrasinal previamente asignados ou polo uso doutros sistemas de identificación dixital.

3. As probas de avaliación consistirán na realización de exercicios demostrativos de coñecementos e da posesión de habilidades e actitudes, en dar resposta a preguntas de diferente natureza e en resolver casos diversos ou actividades practicas. Os aspectos concretos de definición destas probas así coma os baremos de superación das mesmas serán publicas e estarán a disposición das persoas interesadas.

4. Promoverase o modelo de convocatoria continua online e cunha ampla oferta de lugares e datas onde realizar as probas presenciais. As persoas poderán elixir de entre a oferta dispoñible a data, o lugar e hora para o exame. Co fin de garantir a igualdade de oportunidades, a oferta estará distribuída por todo o territorio galego contando cunha rede de centros colaboradores ou lugares autorizados.
5. As persoas interesadas que non se presenten sen xustificación a unha proba, ou presentándose non a superen, non se poderán volver a presentar á unha nova proba ate que non teña discurrido un prazo mínimo dun mes contado desde a data de realización.
6. A proba de avaliación levarase a cabo indistintamente en lingua galega ou castelá, e a lingua poderá ser elixida de xeito voluntario ao inicio da proba.
7. As ferramentas dixitais a empregaren na obtención do certificado galego en competencias dixitais terán que cumprir as pautas de accesibilidade ao contido na Web 2.0 establecidas polo Consorcio da World Wide Web.
8. Así mesmo as persoas con discapacidade legalmente recoñecida poderán pedir, na solicitude de participación, a adaptación ou adecuación do tempo e dos medios materiais necesarios para a súa realización.
9. Co fin de garantir un acceso acceso igualitario ao certificado galego en competencias dixitais poderán promoverse convocatorias extraordinarias para persoas con discapacidade que impulsen a súa integración dixital.
10. As persoas usuarios ademais de obter o certificado galego en competencias dixitais, poderán obter tras as probas un informe do exame con recomendacións de novos itinerarios formativos para mellorar os seus coñecementos ou avanzar de nivel.

Artigo 8. Solicitude de certificación

1. As persoas interesadas en obter a certificación presentarán unha solicitude dirixida á Axencia para a Modernización Tecnolóxica de Galicia na que se fará constar a documentación acreditativa de estar en condicións de obter a certificación en base aos criterios ditos no artigo 5.
2. Promoverase a xestión dixital completa, segura e automatizada, seguindo os criterios de desenvolvemento da administración electrónica na Xunta de Galicia, tanto para a inscrición, a

reserva de data de exame, as comunicacións, o rexistro de usuarios, o rexistro de certificados, o rexistro de entidades colaboradoras e para que as persoas podan acceder e descargar o seu certificado ou o informe en formato dixital.

3. Para poder participar en calquera das formas de avaliación contempladas para a obtención do certificado galego en competencias dixitais as persoas interesadas terán que satisfacer o pago das taxas legalmente establecidas.

Artigo 9. Formalización e emisión de certificados

1. A expedición dos certificados previstos nos artigos anteriores é competencia da Axencia para a Modernización Tecnolóxica de Galicia.

2. Contemplantase o formato dixital e de documento electrónico coma o principal para o certificado galego en competencias dixitais, independentemente da súa forma de obtención. Poderán empregarse outros formatos complementarios.

3. Os certificados incorporan marcas de seguridade e de autenticidade, e numéranse mediante series alfanuméricas, independentemente da forma e soporte de expedición.

4. Cada certificado identificarase cun número único.

5. As persoas que obteñan o certificado galego en competencias dixitais poderán dispor do seu certificado dixital en liña ou tamén poderán dirixir unha solicitude á unidade competente na xestión do rexistro galego de competencias dixitais para obteren unha copia do certificado en papel, numerada e asinada.

6. A certificación en calquera dos seus formatos terá polo menos o seguinte contido:

a) A identificación da área de dominio, competencia e nivel de aptitude certificado, nos termos establecidos nas dimensións que conforman o marco galego de competencias dixitais.

b) Os datos identificativos da persoa titular da certificación.

c) O código do certificado.

d) A data de certificación e modo de obtención.

e) Os coñecementos, habilidades e actitudes que se acreditan.

f) E se é o caso, do centro formador e/ou avaliador autorizado.

7. A certificación en competencias dixitais das persoas empregadas públicas, formará parte integrante do expediente profesional.

8. A expedición de copias auténticas do certificado galego en competencias dixitais rexeranse polo disposto no artigo 64 da Lei 4/2019, do 17 de xullo, de administración dixital de Galicia.

8. No caso de que unha persoa obteña mais dunha certificación en áreas de dominio e niveis de aptitude diferentes, poderanse expedir certificados acumulativos coas condicións e contidos anteriormente descritos.

CAPÍTULO III

Xestión do Marco e do certificado galego en competencias dixitais

Artigo 10. *Órganos competentes*

1. Os órganos e entidades seguintes teñen que garantir, nos termos establecidos neste decreto, o dereito da cidadanía a dispor dun medio de acreditación das competencias dixitais:

- a) A Axencia para a Modernización Tecnolóxica de Galicia coma entidade xestora
- b) O comité especializado para a definición e concreción do marco galego de competencias dixitais.
- c) As entidades públicas e privadas colaboradoras

Artigo 11. *Entidade xestora*

1. Corresponde á Axencia para a Modernización Tecnolóxica de Galicia a xestión do marco galego de competencias dixitais, a actualización do documento de “Bases para o desenvolvemento do Marco Galego de Competencias Dixitais” previa a súa aprobación polo Consello Reitor da Amtega, outorgar a certificación galega de competencias dixitais, así como a xestión do Rexistro de certificacións galegas de competencias dixitais e o rexistro de entidades colaboradoras.

2. A aprobación do marco galego de competencias dixitais, e as súas sucesivas versións farase por resolución da Directora da Axencia, previa aprobación do Consello Reitor da mesma.

3. Adicionalmente corresponderá a Axencia para a Modernización Tecnolóxica de Galicia:

a) levar a cabo as actuacións de carácter técnico e material que sexan necesarias para executar as previsións de acadar o establecemento do marco galego de competencias dixitais e o certificado galego en competencias dixitais do xeito que se prevé neste Decreto.

b) promover a difusión do marco galego de competencias dixitais.

c) promover acordos ou convenios de colaboración con outras administracións nacionais ou internacionais, e entidades públicas e privadas, que permitan o desenvolvemento dos plans de implantación necesarios para o desenvolvemento das accións reguladas neste decreto.

Artigo 12. Comité especializado para a definición do Marco Galego de Competencias Dixitais

1. Créase o Comité especializado para a definición Marco Galego de Competencias Dixitais.

2. Son funcións deste comité especializado:

a) Propoñer os contidos concretos do marco galego de competencias dixitais, así como a súa actualización para a adaptación as necesidades dos colectivos destinatarios.

b) Propoñer os criterios de homologación de formacións previas para acadar a certificación.

c) Propoñer o recoñecemento de equivalencias con outras acreditacións, títulos, diplomas ou certificados ou títulos na materia, así como propoñer os criterios de convalidacións, equivalencias, homologacións e recoñecemento de certificados de competencias dixitais doutros territorios ou administracións.

d) facer seguimento do proceso de avaliación das competencias e propor estratexias para acadar os obxectivos do modelo de acreditación, dende a perspectiva técnica e pedagóxica.

3. As propostas do comité especializado formalizaranse na evolución do marco galego de competencias dixitais e quedarán recollidas no “Documento de bases” que será aprobado polo Consello Reitor da Amtega, e publicado por resolución da persoa que ostente a dirección da dita Axencia.

4. Neste comité especializado estarán representados a entidade xestora deste marco galego de competencias dixitais, os departamentos con competencia en materia de función pública e de avaliación e reforma administrativa, o departamento competente en materia de formación profesional para o emprego, o departamento con competencias na ordenación e desenvolvemento das ensinanzas no sistema educativo galego, na formación e

desenvolvemento profesional do profesorado que presta servizo nos centros do sistema educativo galego; así como as escolas de formación da administración pública galega.

5. Poderase invitar a participara neste comité especializado a outros departamentos, outras administracións ou entidades públicas ou privadas, en función da materia a tratar para unha mellor concreción das áreas de interesa na materia deste decreto.

Artigo 13. Entidades públicas colaboradoras

1. A Escola de Administración Pública de Galicia (EGAP), a Axencia de Coñecemento en Saúde (ACIS), a as outras escolas de formación do persoal da Xunta de Galicia, así coma a propia Amtega a través das aulas da Rede de centros para a modernización e a inclusión tecnolóxica (Rede Cemit) cooperarán, no seu ámbito de competencia, na execución das actuacións para a xestión da certificación en competencias dixitais, e están habilitadas e autorizadas para a formación e avaliación cara á súa obtención .

2. Nos programas de formación promovidos polas escolas de formación do persoal empregado público incluíranse os plans de capacitación dixital que garanticen a posibilidade de obtención da acreditación para o persoal empregado público. A estes plans poderá acceder o persoal empregado público de outras administracións no territorio galego.

Artigo 14. Outras entidades colaboradoras

1. A Amtega poderá asinar convenios con entidades recoñecidas como colaboradoras que faciliten a implantación do Marco Galego de Competencias dixitais, sendo habilitadas e autorizadas de acordo coas previsións deste Decreto.

2. As entidades colaboradoras interveñen no proceso de obtención do certificado galego en competencias dixitais mediante a disposición de instalacións e recursos para a celebración de probas avaliadoras ou a realización de actividades informativas, divulgativas, asesoramento ou formativas para a obtención do certificado galego en competencias dixitais. Poderán delimitarse nas propostas de resolución ou protocolos e acordos, os colectivos e alcances concretos da colaboración.

3. A Axencia para a Modernización Tecnolóxica de Galicia será a responsable de realizar as propostas de requisitos para a autorización das entidades colaboradoras, tramitar o procedemento administrativo de autorización, levar a cabo o seu seguimento técnico e administrativo así coma o cumprimento e a súa supervisión. Será tamén a responsable de

promover a ineficacia sobrevida da autorización previa instrución do procedemento que corresponda.

4. O persoal das entidades colaboradoras que interveñan coma formadores, capacitadores, examinadores ou orientadores para acadar un determinado nivel de certificado galego en competencias dixitais, deberán contar con acreditación do certificado de competencias dixitais na área de dominio e competencia, e cun nivel de aptitude igual ou superior ao que estean a colaborar.

5. Poden adquirir a condición de entidades colaboradoras:

a) Os centros de innovación e formación para o emprego dependentes do servizo de emprego de Galicia así coma os seus centros colaboradores.

b) Outros centros, públicos ou privados, que teñan como principal finalidade realizar actividades de ensino, formación, integración dixital ou de desenvolvemento do ecosistema económico dixital galego.

6. No caso de entidades públicas poderán chegarse a acordos de colaboración en virtude da firma de protocolos ou de acordos sen que sexa necesaria a tramitación de procedementos administrativos.

Artigo 15. Capacitación, divulgación e autoavaliación

1. De conformidade co Artigo 14 da Lei 4/2019, de 17 de xullo, de administración dixital de Galicia, fomentárase a existencia dunha oferta de capacitación dixital suficiente para a obtención do certificado galego de competencias Dixitais. A Axencia para a Modernización Tecnolóxica de Galicia elaborará o plan de capacitación para a preparación do Certificado galego en competencias dixitais e porá a disposición da cidadanía os medios e contidos necesarios para o seu desenvolvemento.

2. Corresponde a Axencia para a Modernización Tecnolóxica de Galicia a facultade de levar a cabo as accións de divulgación sobre as competencias dixitais e o certificado galego en competencias dixitais, e promover o diagnose certa da realidade por vías diferentes as de certificación e acreditación, como xeito de identificar as fendas de competencias, eliminar a crenza do falso dixital ou evidenciar a realidade comparativa co novo marco de competencias dixitais.

Artigo 16. O Certificado galego en competencias dixitais e os procesos de emprego público

1. A acreditación dos certificados dentro do Marco Galego de competencias dixitais poderán valorarse como mérito ou establecerse coma requisito de participación nos procesos de provisión de postos de traballo ou de selección de persoal, nos termos que estableza a normativa reguladora da función pública da Xunta de Galicia ou doutras entidades do sector público autonómico nas súas áreas de competencia.

CAPÍTULO IV

Rexistro de certificacións e de entidades colaboradoras

Artigo 17. Rexistro de certificacións e entidades colaboradoras en competencias dixitais de Galicia

1. Créase o Rexistro de certificacións e de entidades colaboradoras de competencias dixitais en Galicia (en diante, Rexistro), co fin de simplificar a xestión da certificación e facilitar o seu arquivo e control.
2. O Rexistro está adscrito á Axencia para a Modernización Tecnolóxica de Galicia, que asume todas as funcións asociadas á xestión do Rexistro e, en particular, as seguintes:
 - a) Informar, asesorar e orientar sobre a certificación e o Rexistro.
 - b) Xestionar o proceso de inscrición e consulta das certificacións rexistradas.
 - c) Resolver as reclamacións presentadas polas persoas usuarias do Rexistro.
 - d) Preparar e emitir informes de seguimento relativos á certificación e ao funcionamento do Rexistro e realizar propostas de mellora.
 - e) Elaborar periodicamente estatísticas dos datos reflectidos no Rexistro en coordinación co órgano estatístico sectorial que corresponda. Estas estatísticas faranse públicas a través do portal institucional <https://www.xunta.gal>

Artigo 18. Contido e funcionamento do rexistro

1. O Rexistro organizarase en función do código das certificacións. Cada certificación recollerá, ademais do contido previsto no artigo 10 deste decreto, os datos relevantes para o funcionamento do Rexistro.

2. Inscribíranse de oficio as obtencións de certificacións de competencias dixitais, así coma as súas renovacións, as emisións de duplicados e copias dixitais, de xeito que se poderá extraer para cada persoa interesada, identificada polo seu número de DNI ou NIE, un listado das certificacións obtidas, vixentes, renovadas ou caducadas.

3. As entidades colaboradoras autorizadas inscribíranse de oficio no Rexistro, farase publicidade da súa colaboración, e estarán obrigadas a exhibir en lugar visible para as persoas usuarias os distintivos de entidade colaboradora. A declaración de ineficacia sobrevida comportará a cancelación da inscrición rexistral correspondente, ao mesmo que o cese de colaboración por decisión unilateral ou acordo entre as partes.

Artigo 19. Acceso aos datos do Rexistro

1. Os datos contidos no Rexistro poderán ser consultados de xeito electrónico e a través de sistemas de interoperatividade:

a) Polo sector público autonómico de Galicia.

b) Por outras administracións públicas ou entidades instrumentais vinculadas a estas ou dependentes delas.

c) Polas persoas titulares da certificación ou as que elas autoricen, respecto da súa certificación e por accesos dixitais.

2. Os datos de carácter persoal que consten na documentación de cada certificación e no Rexistro protexeranse conforme o previsto na normativa vixente.

CAPÍTULO V

Competencias dixitais no marco do sistema educativo galego

Artigo 20. Xestión do marco de competencias no sistema educativo galego.

1. A avaliación, recoñecemento, acreditación e rexistro das competencias dixitais no ámbito do sistema educativo realizarase pola Consellería de Cultura, Educación e Universidade co procedemento que esta estableza na Resolución do 2 de xullo de 2020, da Dirección Xeral de Avaliación e Cooperación Territorial, pola que se publica o Acordo da Conferencia Sectorial de Educación sobre o marco de referencia da competencia dixital docente e da normativa de aplicación en materia de educación e formación

Artigo 21. *Equivalencias de competencias dixitais acreditadas no sistema educativo de Galicia*

1. A Axencia para a Modernización Tecnolóxica de Galicia e a Consellería de Cultura, Educación e Universidade, establecerán os mecanismos de coordinación dos procesos de xestión do marco e rexistro de certificacións de competencias dixitais, entre os que se establezan no sistema educativo e os que se establecen neste decreto para a cidadanía galega.

2. A AMTEGA e a Consellería de Cultura, Educación e Universidade establecerán a equivalencia das competencias dixitais obtidas no marco do sistema educativo coas que se establecen por este Decreto para os cidadáns de Galicia.

Disposicións

Disposición adicional primeira. *Habilitación para o desenvolvemento e execución.*

A persoa titular da Consellería de Facenda e Administración Pública, poderá ditar cantas disposicións normativas sexan precisas para o desenvolvemento e a aplicación deste decreto, por proposta da Axencia para a Modernización Tecnolóxica de Galicia

Por orde da persoa titular da Consellería de Facenda e Administración Pública, poderanse establecer fases temporais para a posta en funcionamento da Comisión consultiva, do rexistro e da oferta de certificacións posibles, mais en todo caso deberá ofrecerse ao menos dous niveis certificativos nos primeiros dous anos de vigor deste decreto.

Disposición derogatoria única. *Derrogación normativa.*

Queda derrogado o Decreto 218/2011, do 17 de novembro, polo que se regula a certificación galega de competencias dixitais en ofimática, o coñecido como CODIX así cantas normas regulamentarias preexistentes que resulten contrarias ao disposto neste decreto.

Disposición transitoria única. Sobre a vixencia das certificacións CODIX.

1. No prazo máximo dun ano desde a entrada en vigor deste decreto ditarase a orde pola cal se aprobarán os criterios de homologación da certificación galega de competencias dixitais en ofimática (CODIX), regulada polo Decreto 218/2011, do 17 de novembro.

2. No caso do persoal empregado público estableceranse no prazo máximo dun ano desde a entrada en vigor deste decreto, os criterios de convalidacións das acreditacións que se teñan obtido e que teñan relación directa coa implementación das tecnoloxías dixitais na administración pública, con contidos vixentes e aplicables.

Disposición derradeira única. *Entrada en vigor.*

Este decreto entrará en vigor ao día seguinte da súa publicación no Diario Oficial de Galicia.